

磁州續志卷之六

知州事程光溼纂輯

藝文記

磁境水田原緒記

天地自然之利取不盡用不竭者莫如水禹平水土復盡力乎溝洫蓋因民之所利而利之惠而不費之政所宜先務之爲急也顧疏濬導引使之旁通曲達則實有賴于人功磁境滏河引其流以溉田舊有南北中三渠中渠爲州牧包公宗達開於前明洪武年

間南北兩渠則州牧孫公健牛公維赤先後開于萬

歷年間三渠分漑各村稻田二百餘頃

國朝州牧蔣公

擢

又于各渠接開小渠漑稻田二百餘

頃民生用是饒裕僉謂仁人之利溥焉而不知開大

利之原尤有前於此者嘗閱朱平涵湧幢小品有云

辛丑予南歸經磁州遍野皆有水溝深不盈二三寸

濶可徑尺從橫曲折隨地灌注禾黍蔚然予異之問

僕夫水何自來遙指西山曰此泉源也問泉那得平

流則先任知州劉國徵從泉下築隄障之高丈許隄

高泉與俱高因地勢相引而下大抵高一尺可灌十

高泉與俱高因地勢相引而下大抵高一尺可灌十
里丈許則灌百餘里一州遂爲樂土據此磁州水利
劉公實爲開山之祖當與包孫牛蔣諸公並傳不朽
乃姓名不載於府州志內將毋掩前人之善與夫前
人非必近名以爲善後人詎容被惠而不知爰述紀
事之詞竊比表微之意是則食德飲和者所當馨香
永奉無忘始事之人傳曰有功德于民則祀之蓋賢
侯之利澤直與滏水以俱長也

重修磁州學宮記

邑人
張堃 貢生

聖天子建辟雝以造士藝倫攸敘禮教休明固已觀人文
而化成天下矣顧鄉學與國學並重其散在州縣者
則良有司責焉磁州爲畿南鎖鑰神廟西峙滏水南
環代有偉人蔚然興起蓋靈秀所鍾也 聖廟在

城中東偏明洪武五年州牧周公敏移儒學置今所
嘉靖中州牧栗公永爵置泮池於櫺星門外

國朝康熙二十一年州牧任公塾三十七年蔣公權
重加修造今百餘年矣歲月厯遷彫敝日甚嘉慶十
三年長白博公知磁州事甫下車見學宮傾圮念工

爲四民之首觀化之原鼎新斯亟因與學師及紳士
共相籌議先捐俸銀三百金以爲闔邑倡而紳士商
民亦皆踴躍樂輸董事者復多廉幹之士鳩工庀材
協力勩贊州長復時時督率之越一年告成其本有
而全易者先師殿五間名宦鄉賢祠各五間尊經閣
三間明倫堂五間廟西忠義祠一所其已缺而修葺
者兩廡各二十一間其本有而增加者梓潼宮三間
後殿三間其全圯而修復者櫺星戟門各三間
崇聖祠三間德配天地坊三間東西兩翼門各一間

大照墻一座聖域賢關坊各一間騰蛟起鳳坊各三間程宗祠三間讀書亭三間東邊射圃一所南面

文昌閣一所祭器樂器庫各一間水湮而重濬者徑旁泮池石失而更立者池上橋欄又大門外青雲路久爲民居侵佔其議開通不使壅塞此工程之大畧也至今殿內之文罇花城殿外之平臺石欄殿上則金碧輝煌殿前則丹楹壯麗臺前甬道廠如也門外園橋朗若也其他垣墉戶牖黝堊丹漆靡不工整信哉宗廟美百官富萬俎宮墻言言佻佻非知先務而

能若是乎且夫政之善者即小可以見大今學校之地煥然一新則平日之撫綏整飭興利除弊得尊師典學之要以爲化民成俗之本其治績固章章可考矣夫以賢父母修起庠序揚厲人文所期望於州之人者既深且切吾州人之衣縫掖而習誦絃者宜何如鼓舞振興而後能仰承德意也州長名博爾多薩克達氏滿洲鑲黃旗人邑人士喜學官之落成也囑爲文

重修東湖 關帝廟碑記

邑人許 喊貢生

東湖者城東北隅一方池也瀕湖有廟至爽塏蓋奉關聖帝君者余晉謁時見樹木蕭森水天一色而殿宇隱見其間稱勝境焉廟重修於道光初年善士李瓚及十年地震圯者過半瓚傷舊績之湮拮据八載或出諸囊橐或募自士民曰殿曰廈曰樓曰門壁曰僧寮以次塗墍巍然煥然視昔有加襄其事者則坊社諸公及僧人清源等亦與有力十八年工竣而龍亭衍未就碑亦未刊閱五年瓚則物故矣今年秋諸董事始議鳩工以竟厥緒逾年始藏事焉而屬余爲

記余曰諸公於是役何懃懃若是也謂非 帝德有以感之與今夫義利者善惡之地也公私者義利之門也私則爲身利爲子孫利縱盜國盜天下襲王稱帝其惡愈遠愈彰而愈不掩 帝則勇於爲義一意奉公至於身殉社稷其善愈久愈彰名且與乾坤並壽同時若魏操者則躋之徒也操之營私也奉主而陰奪其權禮賢而潛樹其黨殘民而陽逢其欲匡國而假冒其名喻利放利窮極乎古今不爲之惡而爲之 帝則浩浩焉落落焉力盡於討賊而威武不屈

志堅於歸漢而挫敗不移其善也其篤於公義也夫
帝之於操非幾幾相合者哉當徐州之失操慕

帝之義欽之重之百計留之必欲使 帝之篤於公
義者爲己利 帝非不德之以圖報也而去就綽綽
心跡燭然終不使操爲己免又何冰炭殊方薰猶異
器耶迄今 帝亡矣操亦亡矣磁故操之地也操未
必無德于磁也無論天下唾操詈操磁曾有一壇一
宇肖操之像而祀之者乎 帝未嘗封於磁也無論
天下尊 帝敬 帝即磁之以廟祀 帝者奚啻數

百所此非於 帝有私也義之昭著於人心者有然也今坊社諸公重新斯廟其亦出於大公之心而義有不容已者乎余也謬有志於彰善癉惡故申斯義俾後之覽者觀焉是爲記道光二十四年甲辰七月朔日

老母泉記

邑人張文振

磁陸開村山羊寺側疊嶺重岡澗隧回曲泉源出焉澗之比泉竇尤幽邃其水自半崖而下莫測其所從出涓流綿遠亦不知歷幾千百祀俗傳曰婆婆港既

而山牟寺有尼時見一老媪來此遊息容止異於恒
人問其家所在則曰居是港久矣時人異之乃復以
老母名泉是說也或疑其怪誕有識者則以爲能利
萬物者莫如水此泉終古懸流雖大旱未嘗匱竭其
於萬物灌溉長養生生不窮有母道焉且其歷年遼
乎遠矣名之曰老母固宜而尤有異者比年每值春
溫疫氣流行居人多病喉腫甚則爲瘡瘍有黥者冥
想老母之靈爽而敬禱之以飲泉水則厥疾旋瘳由
是遠邇聞之操觚汲水者曰踵接而病者徃徃獲全

人皆以爲神乃肖老母像祠祀之有訾之者曰山有是泉久矣何至今遽神乎不知凡物能療人之生命蠲人之疾苦皆謂之神可也如醫方立神丹聖散之名要之一草石之功耳而動有神效泉之愈疾更捷於是其間豈無神物獲持謂之爲神又何疑焉嘗考神農書註泉水之說美其能消瘡腫合散博物志云凡飲水療疾當用新汲清泉扁鵲傳亦云療疾飲以上池之水是各緣其水之性以成治疾之能在昔用之常驗何獨至於今而疑之且人之或夭或壽原於

命也人之有貪有廉賦於性也乃飲南陽之菊水則
人人得壽飲石門之泉水則比比懷貪似水能移人
之性命而變易之則是泉之能愈人疾亦猶是也嗚
呼得不謂之神矣乎春秋傳曰山川之神水旱癘疫
之不時於是乎禱之禮曰禦災捍患有功於民者則
祀之是泉也驅疫禦災有功於民者甚鉅歲時以祀
之又誰曰不宜余愧目暗不能仰瞻神像聽羣議之
紛紜恐後世果以爲怪誕而廢此祠也因爲之記而
泐諸石以當矇誦焉元大安三年庚午夏五月望日

謹記

興修滏陽書院碑記

磁州知州博尔多

滏陽畿南一大郡也太行峙其西漳河繞其南其規模廣濶不與四方同文學之士萃其境則必拓其心胸高其瞻視凡興賢育才之地當多闢其途極一時之盛謂如是始足與泮水芹亭相表裏是則一郡書院之設洵不可缺矣余以樞庸承乏來守是州殫力矢公百廢頗舉訪所謂諸生講學之所蕩然已久無以來鑪山之佳氣又何以浦漳水之文瀾乎乃於修

葺學宮甫畢而以其餘力及之捐俸以爲之率從九
品張林功施地基一所瓦屋三楹由是州人士翕然
鼓舞鳩工庀材其勲陶且積於濱匠且備於肆
爰哀集木石瓴甃之屬諷吉劊之盛其形勢若者爲
師席若者爲生齋若者宜爽塏若者宜深邃綜理周
密措置分明操畚運斤不日而落成俾諸生讀書其
中無耳目之紛則心定而業專此固人文樂育之所
關非僅宏濶飾觀瞻已也方今

子誕敷文德州人士誠仰體右文盛治砥行礪名則

是邦之絃歌雅化不且與紫陽鹿洞後先輝映哉余
思多士奮興既地靈必將人傑振夕秀更啓朝華咸
思和其聲以鳴

家之盛焉則余區區之厚望也夫遂書修建月日記
董事姓名以垂久遠

程氏書院公捐經費碑記

徽州知州盧蘭馨

書院爲造就俊選之區延聘師儒設立程課修儀飲
饌有奉也膏火獎厲有資也與一切零星支給綜而
計之歲不下數百緡經費之預籌誠至亟矣然而規

必策萬全法宜圖經久事當求可繼苟且補苴於目前勢將終匱磁邑書院在賢宮之左前任博公創建以程氏二夫子嘗讀書於是邦也顏曰二程用誌景仰嗣靈石何公涇陽王公歷城施公迭爲勸捐得制錢三千九百串權子母以濟院需迨地震告災沈牧盡貸存本給公用遂合往昔良規一旦烏有而書院幾廢余於道光十二年來汴茲土講堂肄業諸舍賴前刺史楊君之力集貲興復惟地脉未靜牆垣窳槁間復摧隤余乃借撥他款以畢治之而仍課士其中

第數載以來捐廉尙辦胡可持久且夫千金之或非
一狐之腋也大厦之構非一木之材也質以始覆而
有基力以眾擎而易舉己亥夏余首出俸金倡立捐
籍屬諸紳士廣爲勸輸閱數月按籍而稽哀然有制
錢四千九百餘貫既劃歸借撥款遂以四千六百貫
之券發交鹽當各商分領生息已乃由郡而省申告
大府備立文卷庶幾南山可移此案不易並將商人
領本之帖達於藩庫永杜將來覬覦書院舊有水地
一項餘影射者越訟肆奪藉圖侵漁籲於郡清而出

之得仍歸於院今而後書院乃復有經費矣爰告司
事量歲入之數以爲出詳議章程明定規約毋苛母
縱母儉母奢則核所不足者亦僅焉按州志先儒程
子之父嘗守是州有德政二程之讀書於是隨父任
也敢以程氏易舊稱善則歸親於義較刻且信而有
徵益宏邦人景仰之思不尤愈乎夫培養人才固司
牧之專責而敬恭桑梓實好義之可風記曰有某舉
之莫敢廢也又曰善歌者使人繼其聲善教者使人
繼其志余嘉磁人踴躍輸將十餘年廢墜之故頓

舊觀宜有所述以旌厥美又懲於前而志於後多方
措置思垂久遠歷敘顛末勒此貞珉冀後之君子觀
感興起或繩繩勿替或源源而來庶經費益臻充裕
由是菁莪棫樸蔚爲

子久道化成之治不亦躋與是舉也凡與有勞者暨
捐輸人數例得備書列之如左

同治壬戌官紳禦寇記

學正 戴襄清

同治元年十月間降匪張錫珠等叛逃糾合崔興支

石州新志 卷之六
岳占瀛楊礪溪教演技勇竭力巡防蓋皆著有勞績
而帷幄運籌決疑定策則訓導張琨侯選府經歷趙
定勲之力居多焉

重修忠義孝弟節孝兩祠記

署磁州知州

趙烈文

同治之初旣戡定禍亂

帝乃不茂聖治首以正人心厚風俗爲施化本凡鄉曲
匹夫匹婦一行之畸皆得蒙顯揚邀殊典郡縣吏奉
行故事致謹重焉其九年烈文承乏權知磁州越歲
仲春將有事於泮宮先一日召胥吏考羣祀之制胥

則束薪爲炬密若繁星賊望而北竄爰會合東比鄉
五約民團數萬家與賊大戰於西韓村再戰於邊董
商城等村斬獲無算賊始敗北旣而窮追爲賊反噬
各村死事者二百餘人後皆請旌入昭忠祠賊
亦自是遠竄是役也高牧總持全局內守外攻殫盡
心力守備王九如千總吳英傑會同帶領兵勇堵禦
截勦署學正王雲臺吏目張熙載帶隊嚴防晝夜巡
緝拔貢王鶴鳴附生范大琛等總理團練搽防堵禦
始終不懈附生張仲春等總辦鄉團勇於戰鬥武生

石州新志 卷之六
岳占瀛楊礪溪教演技勇竭力巡防蓋皆著有勞績
而帷幄運籌決疑定策則訓導張琨侯選府經歷趙
定勲之力居多焉

重修忠義孝弟節孝兩祠記

署磁州知州

趙烈文

同治之初旣戡定禍亂

帝乃不戕聖治首以正人心厚風俗爲施化本凡鄉曲
匹夫匹婦一行之畸皆得蒙顯揚邀殊典郡縣吏奉
行故事致謹重焉其九年烈文承乏權知磁州越歲
仲春將有事於泮宮先一日召胥吏考羣祀之制胥

捧文書以對曰磁諸廟祀皆脩獨忠義孝節等廟

詞闕以數十年忠義孝弟詞故附學宮右節孝詞則

頽於道光十年地震咸豐中民自度曠地遷之以費

緡故皆有祠而無祀胥退亟駕以觀則神位毀棄不

得當祀者主名鄰近小民壞墼垣入居之壁四圍頽

其三屋梁之塵可舉手接也爲憮然者久之遂命工

完葺祠宇潔蠲堂室發邑乘及官文書得忠義孝弟

當祀者二百零六人節孝婦女元二人明四十人

國朝三百五十二人皆爲之位與學正戴君襄清訓

導馬君宗周以禮奉祀及捐資爲歲時牢醕之費別
陳請大名道今布政使錢公鼎銘詳改舉報節孝之
法是歲邑中舉者一百三十八口大府以之入 奏
於是磁人士龔石請爲之記烈文深維我

明祀典 以興俗教民非飾文貌觀具而已也有司困
於簿書期會雖賢者猶以虛文無實後之夫民生秉
彝之好出於性成然非君卿長老有以發而漸誘之
則人欲熾而天理日晦故一家之中父兄好學敦行
則子弟多俊髦之士一邑之中耆老躬尚節槩則少

者無詖淫之失，魯動於上而影移於下，其效昭然。若符節是以大學之教先始於身而推之家國天下，此物此志也。儒者一旦處於民上，不務本原之治，徒謂平爭訟、課賦稅、日坐堂皇、占位署畫，遂足以盡吏職不已，近乎書曰：彰善闡惡，樹之風聲，烈文之於行能。居職曰淺，不獲見民俗之有成，顧邑士夫以良有司之事相勛勉，其敢已於言耶？輒舉揚時化，紀磁嗣之興廢，庶吾之民讀者，知所觀感，興起不猶書之義乎？後之君子，益修明之，其以椎輪爲大路之始焉可矣。

接辦磁州城工告成記

磁州知州程光滢

民果難與謀始乎磁不應復有城也民果不難與成事乎磁又不應今日始有城也蓋嘗返復於其際知事無不可成而遲速難易之故似亦有數焉存乎其間磁帶滏濱漳丁子午之衝趙宋以前屏藩朔漠爲河北重鎮有明以來則

神京之拱衛也其城垣創建規模及歷代隨時增改悉詳舊志無贅矣自

國朝道光庚寅地震十僅一二存其存者亦岌岌若驚

仆以工鉅費繁時方國帑空虛有司不敢以請於民
不安枕者垂三十年今

上御極之元年刺史高公錫康權斯篆甫下車首建成城

之議時捻匪宋景詩糾亡命肆焚戮乘虛累薄城下
紳民亟懇息之議遂定磁地八千頃有奇分繫四十
二約凡大小徭均勻抽派衆不擾而事易集此舊章
也刺史仍其舊不役一民不加派一錢民稱便卽以
二年三月鳩工興築經理有法滴點歸公橐金者源
源至屹屹之規計可躋足俟也乃事未半而刺史解

任去工亦旋寢嗣是以來替人凡六七易其勤民之

思不必不如刺史乃旋作而旋輟或已成而復毀如

是者又十稔於茲矣歲辛未夏五月

澧

捧檄來斯土

有間吏以閱城請往視之爲歛獻者移時顧以京兆

五日且連年歲歉仍未敢驟議興作也越明年政通

民和秋復大熟乃以暇進父老子弟而諭之曰向者

我欲濬斯濠矣而濠濬我復欲除斯道矣而道除幸

爾父老子弟之不余疑也能用命也方今巨寇雖除

伏莽未淨城之亟須圖成也豈止除道濬濠已乎余

亦欲師往事無役爾無多取爾期與爾成此城某許
我乎僉曰如大夫言則磁人福也豈復忍負大夫乎
於是上其事於大府報曰可請於

朝亦曰可於是貲則仍集之衆於是人則悉求之舊誼
吉以癸酉二月朔興工屆期工大集曰某若爲我總
勾稽曰某若爲我督工料又某某若爲我稽勤情若
爲我慎收發予之期約以法各受命以往除大風雨
休工登登馮馮常聲聞數里外期竟凡九閱月而十
年未竟之工於是乎竣夫昔何以遲今何速昔何以

難今何易豈民情之向背分今昔而司事者之才識有逮不逮歟竊嘗歷計十數年來司牧之久暫不時歲收之豐歉不等又間以賊踪之來去無常其不暇及者時也亦勢也茲幸大難削平連年中稔得以尅期蕪事則豈非有數焉存乎其間而遲速難易之故前與後相待而不能相強哉計圍長壹千四百八十五丈高二丈五尺樓高稱是南北月城各三東西二限於地也繼自今農安於野商安於市休養生息安堵無虞與磁八水宜承平豈直百年利哉是役也分

司職掌共若干人而始終規畫全局不務瑣屑不避嫌怨以成此巨工則明經張子守謙王子鶴鳴力居多焉若夫講明大義激勵人心督催彈壓勿懈初終則同城教佐營汎均有微勞顧既分寄司牧之責則皆職分中事不得與二三長老爭尺寸也概從略焉事竣董事者以記請敘其巔末如此

擴充滄陽書院經費記

訓導

馬宗周

書院之名肇於唐盛於北宋維時有四大書院之稱旋增其二若白鹿洞石鼓應天府嶽麓嵩陽茅山是

也我朝崇儒右文垂爲功令書院之設幾徧宇內
彬彬乎家絃戶誦矣沿循日久名實浸乖大抵具文
置之臯比澁塵精舍茂草遂使枕經茹史者行且遁
而徒業嗚呼興賢育才之謂何顧荒棄若是哉惟二
三賢明牧令深識治體者所夕經畫不敢視爲緩圖
蓋端學術以正人心心正人以厚風俗教化之興莫
先於此近時可以語此者其惟刺史小韓程公平乎公
蜀人也幼負雋才由拔萃科舉鄉薦官畿輔三十餘
年累任赤緊徧樹循聲同治辛未以報最中格來治

公樂育之盛心已迺述其事以代操券

潼商道張公陝西監試序

湖南 聶 燾 進士

明以前鄉會闈無內監試 本朝康熙十八年以御

史爲之止於京畿乾隆元年遍及直省定例同考薦

卷呈內監試驗明轉送主考一有情弊卽行糾叅同

考不以佳卷薦主考會同內監試查明題叅是內監

試之設統同考主考而關防之責綦重也乾隆庚午

例同鄉試陝中當事以內監試請大中丞陳公慎擇

其選周視監司中謂莫如公宜越二年壬申 恩科

又越一年癸酉科舉不能易故公自涖任以來充內
監試者三秦中號稱得人僉謂公之力夫公無衡鑒
之權無去取之任而謂公之力者何也則有故焉庚
午闈中同考多以能文自負甫展牘不耐駐目或編
其詞句作笑柄公獨正襟危坐若爲弗聞也者而不
足之意艷然見於面顏主司動色起敬同考退而規
戒自此各矢恭謹一以搜羅爲事凡呈卷公必細閱
陰記其可中否於各房號下卷佳而多者識以圈次
則點下者直咸惴惴然以不得當公意爲恥至爲語

曰薦不好監試惱其嚴肅績密如此是歲苦旱闕出
炕甚公神思靜穆忘其炎煥公餘手自著書筆翰如
流黎明卽起夜分始寐無鉅細悉躬親終事無少倦
論者謂公心細而神足以周之非可勉強而致然也
公旣總覽全場薦卷悉其風氣所趨知全璧之難多
得也棄瑕存瑜之在所選也有司久於簿書旣未能
盡文字之變而風簷官燭少縱卽逝又勢所必然宅
心不可不寬而操鑿不可不慎也爰於壬申闈中作
詩示同考首章云當年結綬洱源濱曾附掄才兩閭

津鬻焚採珠堪照乘况逢棧樸數三秦次章云判來
砥石方呈玉汰去浮沙始認金甘苦諸君俱領畧好
將鄭重副初心一時主考同考口誦心維將事唯謹
屬和成帙至癸酉分校雖非舊員而公之意旨咸知
祇承聞有書其詩於壁間以當坐銘者夫人經年誦
讀辛苦場屋思一當有司目而投非其好重遭按劍
得憐才者憫其勞瘁提操鑑者之耳而警惕之雖不
見錄亦屬心平况平朗照之下物無遁形今茲賦鹿
鳴而去者皆太華河渭之英哉然事循其本功歸所

自不以爲主考同考之力而以爲內監試之力公亦
安得辭耶公世代科甲自大司馬而來五世鄉會墨
暨所傳稿經韓慕盧方靈臯兩先生精選行世治科
舉業者咸習之大父宗伯公典學江南所錄盡一時
知名士海內至今稱宗師之賢者必曰樸園先生公
宰滇時癸卯丙午兩次同考最名得士主考來陝者
皆以前輩禮之庚午闈中主考李都諫呼公曰年祖
蓋公康熙己丑進士歷今四十餘年與李穆堂先生
同年穆堂先生都諫祖也公居恒本儒先之學以教

石少翁
卷之六
三

人舉循良之績以課吏原不偏主制科業而其監試之慎乃如此然則匪唯後來監試者宜法卽士之由科舉以興者亦可思公之用心矣燾庚午壬申兩預分校之列侍公几席久知之頗悉至是門下士有成進士選庶常司民社秉教鐸者感公之澤不能忘也則請曰願有述故序之公姓張名坦字士安號易庵直隸磁州人康熙四十七年戊子秋試舉于鄉己丑聯捷進士初筮仕于滇爲縣令洊升監司分督潼商其歷任治績有 國史在茲不贅

購存崔府君事錄原板跋

石州程光溼
知州

道光庚寅夏北直地大震磁州禍尤烈城垣室廬楹
梁祠廟無不毀者獨崔府君祠巍然獨存溼聞而心

異之及聽鼓來直詢悉此事無異辭益生敬信辛未
夏承乏此地敬奠椒酒靈風肅然詢有記事書否廟
祝以一編進則荒唐鄙俚使人軒渠因思生爲循吏
殉爲明神赫濯聲靈彪炳千古而傳信無書良足慨
也及晤鄉人靜垣黃君始知乙丑歲會應祁州牧姜
君之請編削成書盡除鄙穢溼受而讀之精神煥發

卽以重價購此版永藏祠內以廣流傳而記其顛末
於後繼自今磁之士民過石室而思文翁覩陳編而
念朱邑奮興觀感俗美化行而澤亦得沐神之餘麻
以幸無得罪於百姓無負疚於神明老杜詩云閭閻
兒女換歌舞歲時新神聽何平也民氣何厚也神懽
民樂養瘠變滴是則不佞之所至心私淑者夫是尤
不佞之所听夕籲祝者夫

磁紳舉節孝公稟

書院
山長 宋昌期 安衛
舉人

蓋聞夫婦有倫易定乾坤之位男女以正詩開風化

之原佳耦則綱本在三與父子君臣而並重貞吉
義維從一歷死生常變而不渝所以齊姜矢志於柏
舟曾女銜怨於漆室北宮之子能養遂來趙后之詢
東海之婦能賢用致于公之祀陶嬰喪配作歌明心
王凝有妻示潔斷臂凡皆守終身不改之節堅誓死
靡慝之心者也况

聖朝久道化成咸散俗尙當

聖主改元詔下特序旌揚滄陽地隸 畿封人知節義卽

茲閨閣之懿徽恒有冰霜之特操或則未亡抱憾獨

處空房或則親死如歸相從幽壤或則傷翁姑之失
養補子職於晨昏或則憫兒女之無依留餘生以撫
育恤嫠婦之緯線脚添愁彈寡女之絲琴聲哭別故
皆節堪玉比常完圭璧之躬而實清畏人知祗下瓊
瑰之淚今逢州牧伯恩奉檄咨訪念窮檐之苦節諭
生等以搜羅採訪必周稽查無濫特設公局赴報者
有所適從慨助廉泉食貧者并省經費謹彙節孝婦
女三百餘人并身名之無玷更年例之相符因取具
在學廩增附生及族鄰切結臚列事實伏乞如繕請

册賜文申詳俾得綽楔榮標貞珉共勒入祠祀而馨
香用享揚清芬而存沒均沾體 國家雜風厲俗之
恩禮無再醮示閭閻發潛關幽之意報以千秋典副
至隆芳流不朽咸豐元年欽奉

恩詔州屬選舉節孝婦女共三百餘人具稟由州詳請奏
聞請
旌并泐石爲位祀節孝祠

截擊大股擒匪疊獲勝仗請獎出力官紳議卹
陣亡團勇暨殉難男婦稟

磁州 玉簡
知州

竊維卑州界連豫東地當孔道咸豐九十等年東匪

紛竄逼近州境梟匪又復滋事擾及隣封成安等縣

卑職會同在城文武預爲籌防激勵城鄉團練并雇

募壯勇製備鎗炮器械親自督率扼住要隘以防竄

擾上年十二月間探得捻逆張總愚大股匪衆由晉

省竄至河南安陽縣一帶丞突狼奔意圖北犯卑州

與安陽連界止有漳河一水之隔幸經卑職先已稟

蒙調派副都統春同候補俞道統帶馬步兵勇抵磁

防堵當卽迎頭截擊卑職督率兵役鄉團馳往接應

在安陽之目寺等村遇匪大隊連日對敵屢獲勝仗
殺斃悍賊救出難民多名奪獲馬匹并刀矛等械無
算匪衆未得搶渡本年正月初二日匪衆猝由河南
臨漳縣境過河闌入直境擾及卑州東鄉漳裏等村
該處鄉團悉力堵禦卑職會營帶領兵勇飛往襲擊

匪勢不支紛竄出境迨二月三十日該匪忽又由北

竄回漸至城東一帶卑職乘其喘息未定帶隊馳往

追剿匪衆知已有備未敢停擾仍由臨漳縣境過河

竄去業經卑職將擊匪獲勝并被擾村莊輕重情形

先後具報在案伏查此次匪衆大股闖入州境距城
僅十餘里逆氛甚惡形勢危急萬分幸賴衆志成城

擊匪遠去

卑職

職司守土奔馳戰守自屬分所應爲

不敢仰邀議叙所有同城文武學正戴襄清訓導程
垣吏目趙學棻或辦團防堵晝夜守城或彈壓地方
稽查奸細磁州營守備國治千總韓金釗外委李昌
齡或督率弁兵會同剿匪或奉派帶隊勇往直前均
屬懋著勤勞應請奏獎其生員孫承恩等辦團防堵
亦皆著有勞績應請分別獎叙至陣亡團勇暨殉難

男婦亦請照例議卹除造具清冊另文申送外合肅
具稟 憲台查核請予獎卹實爲德便同治七年四
月申

八品鄉耆許君小傳

學正 載襄清

許瘡源舊志所載許一貫八世孫性醇厚尤篤內行
事親就養無方飲食必手調以進親疾左右扶持連
晝夜不寢親卒兄弟欲析居乃讓良產於伯仲取其
瘠薄者自給友愛愈擊門以內無間言平居待人以
恕嘗有人竊其衣物縱之使攜去秘其事不以語人

石州縣志 卷之六
家人覺而問之曰彼良家子爲此曖昧事我言之恐
爲其祖父子孫辱也固城村程姓租種其田病革泣
而請曰我死母老妻孀無以爲養所租田乞勿奪也
濬源諾之徵租不問多寡未嘗取盈焉時人嘉其行
稱曰良善許家乾隆乙卯冬

詔徵耆老赴千叟宴濬源與焉蒙

賜衣帶銀牌復奉

恩旨授八品職銜時年八十有二迨春臻九秩精神猶

康健不衰

知綏州楊公傳畧

楊方晷

楊承誨字起鳳天啟元年歲貢廷試第一出而爲宰
治房子房子治已而守東平再守上郡兩郡故遭兵
燹人皆卻步公單車赴任內撫而外戢盜用是弭則
兩郡又治又出秘畫贊撫軍定綏州撫軍臚其績疏
於朝人謂公由是可大用也乃公窶甚不能周旋貴
人有以蜚語中者掌道王公鄰華知其賢不爲蜚語
動俾視事如初而忌之者持益急卒亦不能訾公守
而公則拂衣歸矣爲諸生時與張司馬湛虛公高廟

會文出筆之敏如疾風掃葉而一種英思灑氣又如
萬斛珠泉湧地而上滙爲長河九曲奔騰放海乃止
觀其一之日朔赴張司馬文會歌一生氣魄活現紙
上不能不爲之避三舍焉蓋張司馬之素所服膺者
比其歸田而張司馬方總制兩粵粵有古碑無識其
句讀者粵士質之張公張公默點定之而使人以安
車逆公至粵陳兵設帳郊迎三十餘里抵署別書一
通與公公朗誦一過立爲點定出公前所點定者視
之若合符節兩公相視大笑所著自即即今每草烏

烏草遊粵吟詹詹言凡五卷傳於世

內閣學士兼禮部侍郎張公子大傳畧

張榕端字子大號樸園又號蘭樵內翰林宏文院庶
吉士潛子生而岐嶷長面鶴形清肅之氣逼人眉宇
康熙壬子舉河南鄉試經魁丙辰成進士選庶常入
館二年以清書第一授編修旋丁外艱辛酉服闋壬
戌分校禮闈得彭君甯求等十一人館選居其半號
爲極盛辛未開左右春坊晉翰林侍講壬申轉侍讀
充日講官起居注癸酉主順天武闈甲戌應制乾清

石少翁元 卷之六
宮賦雨潤春田詩稱

何
節擢國子監祭酒明年授內閣學士兼禮部侍郎丙
子星輅出使致祭秦岳沂鎮東海是冬督學江南

自飭照巡撫行事所拔名宿如任蘭枝方苞黃越皆入
翰苑稱得人閩河工克勦底定旋歸優游林下子孫
並起於閩族爲極盛性謙抑雖都高位自視歛然著
海岱日記河上草歸田稿寶齋堂集賀蘭雪樵詩集
行世祀名宦鄉賢

刑部郎中張公腹巷傳畧

張丙厚字爾載號腹巷敏幹有古豪挾風有知人鑒於事所難爲者輒自擔任康熙癸酉甲戌聯捷成進士丙子授交城合歲大歉徵餉之檄不轉燭而至者數慨然曰吾其逼民於楛朽也吾有田園售以報完陞刑部郎方閣學靈臯時爲布衣以牽連入獄臺臣雜治事方殷力救之其禍以雪平反者幾二百人不畏疆禦其性然也辛卯分闈得人稱盛旋致政歸里堂弟照乘方應童試家綦貧遺二百金以贍命二子

王壘從之學後照乘起家明經官至浙江嘉興府知府丙厚蓋早已決之己亥磁饑捐金煮粥活人無算業師李明瘠貧且死乏嗣爲置百金產擇繼引之家塾後入泮食餼辛丑西軍急年羹堯聞丙厚盛名奏請効力戎行以不事阿附歸卒於京寓

四川萬縣知縣宋公立甫傳

邑人劉步青序生

宋大中字立甫少失怙時當就傅而家赤貧母氏許紡績以資其誦讀稍長肆力於學年十七補博士弟子員乾隆戊申舉於鄉嘉慶辛酉大挑列一等爲令

蜀中歷署儀隴開縣雲陽通江等縣所至有循聲其

在通江遇災歲歉倡首捐廉勸諭富人出粟爲粥以
食饑者大賈集穀居竒大中嚴禁人感其懇誠乃皆
出糶平民亦遂得飽所全活者無算大吏知其賢題
補萬縣萬劇縣也商賈輻輳奸民伏其中多爲不法
聞大中至皆遁去及履任接引士類恒若不及每見
必咨地方利弊見諸施行民構訟者率多株連公但
令兩造刻期至餘皆除其名吏胥莫能爲奸利萬所
轄地袤延二百餘里官以事出一應供張取辦於民

公每出秋毫無所擾民尤德之自奉甚簡約奉母膳
饒備極豐腆非公出溫清必躬親疾作猶強起爲定
省恐母知其疾勉爲加餐邑人聞之咸具蔬果以獻
既卒貧不能歸旅櫬民爭賻之通江諸縣踰千里奔
赴者甚夥廩生魏士良至八千里助紼送靈輜歸葬
焉萬縣紳民爲建祠於城東曰遺愛祠李伯子贊善
復爲哀輯諸鉅公輓章曰遺愛集程次坡侍御有句
云使君原不死廉吏苦多貧又云斯人不百歲遺愛
足千秋大中於是不死今里之耆舊追朔前董義也

猶津津樂道之

泌陽訓導陳公傳

楊方冕

陳獻字子賢號八夫他山其別號也康熙十一年貢
任泌陽訓導先是山右之長治郭馬村人始祖唐裔
公遷磁籍焉傳六世而生華字文學公生子二公其
次也賦姿穎異總角通毛詩弱冠補邑庠生以科試
第四人食餼甲申

十殿下兵下江左公上箋勸抵關中靖寇氛王著內
院大人李問這秀才比武侯何如對曰不啻雲沉李

又問曰汝比王猛何如答云景略是三秦豪傑與秦
主魚水相投後淝水一敗終是格格不入又問汝比
毛遂何如答云毛遂卽生於今日亦是落落難合設
某處毛遂之世必早見重於平原君矣大人回奏這
是一箇好秀才當官之 王云與他一箇郎中做著

姑隨南征公辭老父尙在未敢以身許國李曰汝不
欲作官上這章奏何意答云草莽小臣特効芻蕘一
得王納之賜茶贈金帛歸居常以扶禮教濟阨危爲
念時丁祭犧牲不備公歷謁上官請復舊制而祀其

成癸巳大旱邑多逋賦甲午養馬溢比民復疲於奔
命州守仍奉憲徵比舊租窮簷束手漸至流亡公致
扎何公痛陳民瘼隨以養馬兌消逋賦民鮮隅泣辛
丑後負笈遊吳越齊閩楚蜀間至海甯見吾鄉許西
山先生講學於尊道書院時有謂志學只是一貫等
語諸生茫然公進質於先生曰一貫是聖人宗傳自
其入手用功已確然見得學須一貫如箭赴的到得
從心所欲便自丹成九轉月照萬川學者乃謂一貫
是聖人末稍得力處然則聖人前半生學問尙屬支

離耶且其教曾子子貢者將爲晚年悟道之言耶抑
舉其平日用功者言之耶須知志學只是一貫乃是
看得聖人一條學脈但有生熟之分必無前後之異
耳先生爲之擊節曰此理學名言也同人其敬聽之
公平生講學開聾啓聵不令人怵舞不止故所至皆
知名焉歸晤許新鄉偶及交趾叛服往事公援筆擬
撫安南策歷抒前代得失朗朗數百言悉柔遠要道
新鄉以是卜其經濟鄭州名士董書衣先生素貧苦
已酉以遊學失科試幾不能入闈公頗饒相助書衣

叩其姓字不語也棘戰十二皆以後場切直被擯從此淡於舉業王子膺歲荐 廷試後與二三知己上

下今古游衍詩詞興至則高歌暢飲辯孔門無三世出妻夷齊無叩馬等事特具論世之識丁卯分訓泌陽時太史公實先生署教諭事日集諸生講太極西銘等書以語公公避席謝不敏先生固請公乃進諸生而謂之曰竇夫子言太極八卦天理良心諸生勿認太極八卦爲二物太極是箇圓八卦八卦是箇方太極勿分天理良心爲兩事尊而言之爲天理切而

言之爲良心太極便是真正天理天理便是真正良
心卽此便悟河源星宿西銘稱乾坤爲父母引民物
爲胞與程子以理一分殊貫之真是片言居要學者
不知理一故流於楊不知分殊故流於墨反覆指示
明白條暢諸生佩服焉子元勛深得其傳後魁天下
成名進士尸祝公不衰舊泌陽學田教官耕種外餘
皆分之書役公曰學田所以養士今不以養士而乃
養胥吏乎隨命計畝出租以給諸生之貧者訓泌之
二年泌典陳浙之丞某人也卒於官妻單子幼不能

歸葬公爲捐俸約衆醵金遣役送浙使遂首邱之願
人稱其義分訓三載以疲於迎送數乞休太守時公
顛而笑曰子高士吾知其無宦情矣爲申請歸里時
年七十有七優游林下者十餘年康熙甲申五月卒
享壽九十有二

知卽墨縣康公傳

楊方冕

康霖生字澤遠號巖菴順治丙戌科舉人己亥科進
士康熙六年丁未冬任廣東連山縣令歷戊申夏凡
五月丁祖母憂九年庚戌冬服闋補山東卽墨縣令

其任連山也尚猶暴橫不知王化公下車單騎安撫
陳以大義猶人咸服連山學宮久廢公擇地建學於
治西興賢里之山麓學成而公去至今人文蔚起誌
公德於不衰其任郎墨也民因逋賦逃亡甚衆公至
急招撫之令其歸堵借給子種耕牛民鮮離散其歲
大登舊欠不比俱輸治東南有華陰集者地處山懷
衆塗交會初無人烟而檜柏甚盛公每巡視阡陌與
父老談於檜下因爲立市遠近便之民漸就居迄今
亦成巨鎮立祠山下肖公象而時祀焉墨城舊無之

關妖氛爲患有形家者令塞北門建真武廟以鎮之
公至笑曰有至理在無庸事此於是相形度勢謀諸
父老價買紳地爲民舍設立北關自建草菴三間以
奉北斗穿井以飲關民人氣舒暢妖遂不作民咸頌
公之明名其井爲康公井十一年壬子以疾卒於墨
署偪歲櫬歸初葬邑西固城村繼遷邑西北潘村墨
人思之又改墨之北斗祠爲五楹戴以琉璃肖公像
於祠之西間四十九年庚寅墨人實公績請入名宦
公仲君桓同季弟祿聞往謝之連有頌曰連尚甘棠

墨有記曰康侯德政桓皆榻而存之公事繼母甚孝
母病乞天請以身代母旋卽愈嘗從父拾遺金州北
守於塗而還之邑西北二里康家莊卽今量斗莊地
勢窪下荒鹹賊無所出公相地形解囊開渠令南方
踏歌男女教種稻秧一村變爲膏壤磁民效之稻田
由此漸闢又延師立學造就族中遠近子弟資以膏
火一時青其衿者甚衆乾隆初年磁人又實公行請
入鄉賢子四桐桓桂栒桐栒國學生桓邑庠生能詩
桂例貢官南陽府裕州訓導

候選直隸州州判張公傳畧

張玉綬字硯耘父祥辰拔貢生官福建鳳山縣以卓異赴部引

見於因患病遂卒於京師旅櫬浮厝蕭寺時玉綬甫九齡

隨母魏寓閩聞訃哀毀如成人諸賓好助貲旋里無恒產依正定外家居焉以弗獲迎柩晨夕號泣戚友惻然資遣入都寺僧憐其貧且感其孝也指示柩所十餘年房租讓而弗受公堂兄知天長縣璠有事於都慨贈以車乃得輿櫬而歸旅次上食如生時哀動

行人抵里安墓教授生徒以供毋菽水泊丁毋艱哀
毀如前狀戊申冬舉行鄉飲酒禮學官率弟子員議
大賓僉謂非公不稱其選牧伯恩向未謀面一見決
爲端人折節禮之次年聘入署課公子讀館五年未
嘗有所請託牧伯益重之生平端方自持雖倉卒不
作草書課子以義方教弟子多所成立中道光乙酉
副榜

淮安知府申公家傳

朱中憲公

諱

程章

字

實夫

號

西村年十九歲入州

由廩生中康熙辛卯科舉人考授內閣中書改任光
州學正雍正丁未春提督河南學政王公特薦於
朝召對養心殿

上顧謂家宰九卿云引見各官申某第一

天顏甚喜謂爲政不外寬猛相濟又宜公淡存心諄諄訓
諭加知州銜出補浙江海甯縣

聖恩眷顧優渥賜有御書香珠紫金錠貂鼠等物蒞任未
半載卽越級升授淮安知府享壽六十歲初爲童子
時卽穎異不羣及爲諸生有盛名鄉薦後屢試南宮

不第凡衡湘吳越間皆所遊歷宰甯邑時甫下車卽有王大成控徐雲卿一案大成乃安化王之裔而雲卿爲邑巨室之僕大成訴雲卿營室掘發王墓後察王墓知在他處非雲卿營室之所乃奸民弄舌陰助大成翻刻縣志欲實其事陷雲卿於法於是先中憲公詣城隍廟對神立誓邑之士庶觀者如堵反覆訊究察大成所報之誌與庫貯舊誌文不相符始知大成之詐此前任屢控未理至是爲直其事將大成與陰助大成之人並杖懲雖先時物論紛紛謂得賄

狗至是咸服其明及守淮安每以身受國恩懼不克
勝任夙夜兢兢以其厥職於二堂公座後題一聯曰
竭心力以報主知不敢但求廉潔廣諮諏以悉民隱
何能自任聰明凡遇大獄虛懷詳訊如淮屬清河縣
李姓田中麥苗爲生員張亢之馬踐食李不甘心鄉
黨和鮮令張某出麥相償張面從退而不與李遂負
其病女向張索討張閉門不納李負女歸月餘而女
病亡李卽誣張腳踢致死邑令檢驗粗率將張擬絞
而張之子亦清邑庠生並繫於獄後知其枉也爲之

平反而張父子脫然民以無寃又淮屬桃源縣大盜
劫獄案內有黃通海者無辜受累遂坐大辟縣審已
定後得其情釋之伊慶更生且留意士林如淮屬安
東縣學生朱霞素不識面因盤查行縣館於其家偶
一見之聞其爲人孝友遂誌於心後奉

旨府道以上許各舉一人卽以朱密摺奏聞而朱猶不知

召見以所舉爲不虛授宜城令潔已奉公稱得人焉又淮
屬盩厔縣學生王鳳翥以誤保童生小過被褫督學

鄧公發府杖繼而先中憲憫生貧士罪尚可宥苦經

有司杖責生將無以爲人力與周旋功名得復次年
鄉試遂中式先中憲素有喉病每作連旬不愈雍正
八年秋大雨連日淮水暴漲城幾湮沒時抱病朝服
冒雨徒行岸上拜禱督吏保護城得無恙而喉疾轉
劇因請退官調疾撫憲不察以爲托病規避而府倅
朱崇豫乘勢排擠遂被劾然心亦不怨也性至儉雖
官太守而飲食無異寒士未仕時頗嗜酒及仕未嘗
一醉生平所著詩文甚富稿多散失不存搜集殘篇
僅得詩若干首並紀一生大略孫祚昌謹識

孝廉方正楊公傳

張坦

鶴巢老人姓楊氏諱方冕字東陽鶴巢晚年別號也世爲磁州人先世代登仕籍爲邑望族先生生而穎異讀書過目不忘鄉里有神童之目未弱冠補博士弟子員性耽經史及宋儒理學諸書家故貧以硯田自給不惟仰事俯育卽先生同懷六人喪葬婚嫁待以舉者十二三其事二人也愉色婉容雖疏食菜羹愜於甘旨之奉親喪旣葬壟墓去城十里餘朔望展拜風雨莫阻迄服闋如一日其先君子捐館舍倉卒

未繙祀容先生又弗諳丹青計窮無出踟躕悲哀笑
以致齊之理翕精凝神思其飲食居處笑語夜以繼
日愴然見聞遂任心以運楮不再易頰輔宛然質之
精於繪事家皆嘆爲不及豈非誠孝所感有通於神
明者歟先生不專務帖括而於先民矩矱不摹自合
其及門諸弟子往往膺選拔掇甲乙科及仕而爲方
面者指不勝屈而先生獨困於場屋僅循例貢成均
乃毫不以通塞介念愈潛心於身心性命之學以故
遠近向風河朔之士擔簦躡屩請業無虛日實至名

歸聲譽日起州牧新除至必式廬乞言先生毫不私干獨於公事利弊直言無隱故當事益重之

今上御極之元年奉文舉孝廉方正州牧俞公遂據州人士公舉力薦而制府李公又玠亦耳欽先生名遂特本具奏先生尚不欲行有司敦促不得已抵保陽方是時

上初卽位延攬英賢以先生學品摺送引

見咸以爲可立致清華而勸勉再四堅以疾辭制府知不可奪遂奏以六品頂帶旌焉旣得請歸田里益閉

戶著書以其餘閒發爲吟咏陶然自適先生體舊弱
清癯如不勝衣而迄於暮年一室校讐吮墨塗丹常
達夜分乃精神湛若反異曩時殆所謂厭飫於仁義
莊敬日强者乎歲甲子先生年七十六偶膺末疾門
人張坦往侍先生曰行與子別有一言以告吾人立
身行已止有一誠中庸言不誠無物天地萬化總不
能外孔門一貫之道只是此理非別有神竒也學者
能主敬以存之誠到至處便是聖人其次卽是賢人
再其次亦可以檢身而寡過若毫無主持庸庸碌碌

與草木同朽可惜也又云吾別無遺憾惟所纂樂經
未完是一不了事耳此易簣前夕也氣象從容毫不
怛化蓋其中之自得者深矣平生著述有聖師年譜
磁人詩集蕉窗瑄言樂經等行世

海鹽知縣張公小傳

楊方冕

張珽字孟芳襁褓中因母病失乳比成童又因目疾
廢學以朝夕承父訓年十七入州庠己亥捐教諭欲
藉寒氈一席稍親筆硯猶爲科名地也卽以新例改
授鄞縣丞鄞傍山濱海頗寫禾鹵田畝全賴塘堰契

開蓄洩得宜丞司水利要隘約有七十餘處最要東
錢湖陀山木儲等堰東岡雲龍等堰近湖礮堰多有
劣衿憲役把持頻年勸諭懲創漸就條理又條其利
弊數事上之監司頗見采擇長春塘介江河之衝爲
潮所毀珽鳩工築之一夕而成己酉以孫觀察薦擢
鎮海令鎮爲浙東門戶竈戶多流亡而民田有溢額
珽均而補之大憲議於民田每畝歲輸錢二文爲築
塘費珽條其不可遂止庚戌丁外艱制府題請給假
治喪仍留浙委用辛亥七月署嘉興賦重民刁訪擇

幕友匝月甫就緒而原任弋引見發回遂改署象山
縣象山濱海地僻民貧丁糧餘額約三四百金卽爲
查清首報行戶有筭炭陋規亦爲革除每歲採買穀
石崇山峻嶺輸運維艱爲之詳定腳價民力少紓邑
築海塗墾田隱漏極多時各省郡縣多以開墾陞科
擢用珽以潮汐無常滄桑易變恐貽民患不敢以報
墾邀功也雍正十一年浙東饑象隔海無河運商賈
不通珽由海運以接濟民食幸獲安全然往來大洋
事亦險矣縣有南田孤懸海中最易戕奸向爲禁地

寅卯間奸民覬其術沃具呈開墾且外布流言陰以
利見啗珽執不可幸當事相信遂罷丁巳計典以閣
部稽公薦調海鹽令未及赴任丁內艱回里守制遂
不出仕

贈中憲大夫副榜張公傳畧

張冲字遂子大司馬鏡心第九子讀書日數千言博
綜典故尤究心性理弱冠謁孫鍾元徵君於百泉談
理學源流積數日夜徵君謂所言有體有用不落支
蔓吾烏能量君所至一生不苟言動而經畫大體鎔

黍弗失蘊蓄深厚有人不及見康熙辛酉河南鄉鄉
試考官施侍讀閔章擬登首選爲從官擢置副榜第
一殊不介意歸後閉門著述旁及諸雜藝畫馬尤稱
精妙家居恒出所有以贍兄弟子姪里有貧不克葬
及有子女未能婚嫁者資之而未嘗有德色里中無
少長咸稱九老先生不以姓蓋敬之極而親之也以
孫照乘爲江西吉安守贈中憲大夫子五人四舉明
經孫登明通榜舉孝廉膺拔貢歲貢及有聲庠序者
十餘人

候選直隸州州判張公傳畧

張逢辰湖南興寧縣令照蔡長子幼惇篤孝友篤氣節學問賅博制義得古文遺意詩賦雜著並工識者以爲傳世之作由廩生考取乾隆己酉科拔貢鄉試兩擬中元悉以主司意見齟齬被抑旋就職直隸州州判需次都門嘗賦春水綠波詩一時傳誦館閣諸公皆欽服由是名噪京師故相和珅時方柄用慕其才欲致諸門下許以魏科逢辰夷然不屑物論高之其生平嚴正類如此晚年猶孜孜講學教授生徒以

終老

知縣上縣王公家傳

先曾王父諱觀宸字晉齋乾隆庚子進士歷官安徽
霍邱縣上知縣以夙有文名奉檄分校江南鄉試前
後凡十科在任三十餘年興學校減徭役善政迭舉
著有循聲頴俗最悍回民械鬥動傷多人公至諭以
禍福民感其誠遂皆安堵曾有以賄請謁者舉楊震
之四知論之其人慙退盜劫吳監生家隨獲盜皆自
供認因定讞通詳後獲首盜乃知中有非盜而誣服

者亟具詳請平反大吏難之再三請始得改免其屈
已愛人類如此嘉慶十三年乞病歸是時穎有積欠
在民漕米萬石曩已代爲墊納署中友人皆勸作交
代抵銷答曰予不願令後任苦吾輩立命取欠簿焚
之籍世隸順天之通州解組後僦寓磁州遂家焉性
嗜學老而彌篤居恒手不釋卷爲文益純粹以精人
皆欽仰請主講磁之滏陽書院傾心訓迪其受教者
率有名於時曾孫鶴鳴敬撰

陳表王三義士合傳

戴襄清

城居武生陳國祥監生袁步青民人王之倫生而驍
勇善騎射遇事不避艱險同治元年十月東匪張錫
珠等竄擾直境突入磁之小屯村維時城中人心恟
恟擬探賊情無敢前者三人自負材武策馬奮往夜
半遇賊驀進手刃數人賊驚呼大股畢至四面圍攻
三人皆被重創陳國祥王之倫卽時陣亡袁步青中
槍由頰貫入左耳刀傷幾斷右肱猶存餘息賊退卽
匍匐人扶掖入城州牧高公嘉三人義烈爲陳王詳
請旌表入昭忠祠表步青給匾獎卹屬其家人

護因傷重久而匱爛逾月亦卒

候選訓導許公小傳

戴襄淮

許臧字全齋州學歲貢生性豪邁胸次高朗家人事不關其懷幼嗜學博極羣書爲文不計工拙操筆立就汪洋恣肆如長河東注珠玉與沙石俱下居恒持三教合一之說道書釋典輒闌入筆端儒者訾之然月旦品評未嘗不重其行誼滄陽書院荒廢已久刺吏博公議興復之而恐力不克舉臧乃倡衆勸捐卒佐博公告厥成功城內文昌宮及城東南文華峰

亦佐博公規畫以次修舉當事恒自主斷人莫能阻
撓事後亦鮮有訾議者其與人交洞見肺腑出言巽
直往往面責人過雖遇者宿達官無所屈抑市物不
虛與人欺鬻者昂其直則多與之間亦懋遷爲小經紀
賒取者每不責償與人款洽或卽以其物贈之無少
吝惜人有緩急傾囊拯濟雖家無升斗儲不計也素
健步履嘗徒行兩至五臺山至則與其緇流談內典
議論風發率常屈其長老或其寺會有修造輒爲之
凡鉢鄉人重違其請恒多所施與晚年不持鉢教自

謂工導引之術然年甲亦未至中壽同治十年六月
病卒得年僅七十有四

高鳳姐小傳

高鳳姐花官營村農家女生而貞靜淑慎鄰里目爲
賢媛嘉慶癸酉年饑隨父轉徙山右鬻於周氏會粵
西楊孝廉耀祖館其地周贈以鳳爲遶室楊君雅重
之丁丑赴禮部試挈鳳行至磁訪知其父尙在鳳請
歸省楊君亦以長途携細弱爲累因留之使依父居
及試報罷以大挑一等之官嶺南未及迎鳳有黠者

窺鳳姿以厚聘餌其父父意奪遂逼鳳嫁鳳曰女流
離中幸依楊君得所歸今背之不祥誓之死靡他黠
者以不得鳳訟於官時山左施公溥爲州牧檄鳳至
諭令書差退避獨訊鳳反覆究詰知其誓守之意堅
慨然曰吾當成若節也乃命其父還黠者貲而寄書
南海吉大令俾訪楊君諭意楊君隨遣使迓鳳施公
復餽贖以資其行磁人感公之德政嘉鳳之貞操一
時傳爲佳話能詩者或作歸鳳曲以志美喪輯付梓

祭高厚文

歲次乙卯十月丁亥初四日戊午主翁大史氏張某
以牲醴庶俎賜祭於故紀綱高厚之靈曰惟汝歷事
我累封通議公顯祖暨大司馬公顯考小心周慎無
餽辭無剩力無弊舉凡家門米鹽薪水至織至悉之
事皆汝經理蓋四十年如一日也我祖我父皆熟信
而任使之余自爲諸生以逮入仕歸里中更患難惟
汝終始不貳事有繁難不委之他人輒委之汝亦以
相信者深也比余六弟夫婦早逝遺此藐孤汝復能

匡護幼主出入貲財條條井井毫無侵混价輩咸有
所忌憚不敢縱恣而余亦因之少減意外之憂茲非
汝之大有裨於吾家乎憶昔甲申寇警廝養星散余
上奉老母下攜弱弟幼子避難西行晝匿宵奔饑寒
困頓兒啼呱呱賴汝襁負保抱徒跣走巖石中足創
流血不自言若乃含沙下石之事不關僞署而出蕭
牆雖深山寂寂風雨時來將恐將懼惟余及汝魂一
刻而靡甯心百折而不變後事平安處每一念及未
嘗不潸然涕下也古人簪屨不遺爲郵舊也如汝非

其人哉此皆由我大司馬公渥澤滋培知人善任一
時門下如李守備道遠拳勇忠勤艱危克衛胡都司
忠靈通敏練跋涉不辭以及武得功之沒齒銜恩蕭
燹身之捐軀踐諾韓國卿之傾囊濟主李朝之棄孥
遠從此數人者皆已彫零物故耿耿余心未之或忘
也至如汝之自少及壯自壯及老奉主持身莫可取
疵又不當於恒人中求之矣今汝子幸讀書遊泮則
天之報汝正未艾也故余之致祭不僅作悲傷語而
特表其生平如此因系之以誄曰貴賤何常所貴者

行汝歷四世服勤熒熒其心較然石固冰清環顧臧
獲茲焉足程潛芳蘋潔載肆碩牲願言享之何間歟
生

曹徵君墓表

元好問

歲丙午秋九月日曹徵君子玉以疾終於襄陰之寓
舍春秋七十有四嗚呼哀哉世豈復有敦龐耆艾之
士如君者乎始予在京師登君鄉先生禮部聞聞公
之門公每論人物及君姓名必極口稱道謂今人少
見其比其後見君於方城介於太原王右司仲及定

交焉君長余十七歲予以兄事之王辰之歲君流寓
洪州癸卯冬予自新興將之燕乃枉道過之死生契
濶始一見顏色握手而語恍如隔世不禁流涕之覆
面也又四年予閒居鄉里與君相望六百里而近耳
妄人有傳予下世者君聞之寢食俱廢至問之卜筮
及就日者王希道推子祿命以自開釋已而知其妄
也又爲之喜見顏間居未幾聞君九月之訃予爲位
而哭且爲文哀之孤子汝弼徒步至雲州求予銘先
人之墓不及見而去君之孫孝待於鎮州者又三月

矣追念平生之言乃泣而銘之君諱珏姓曹氏子玉

其字也世爲磁州滏陽人曾大父圖大父莘父璿皆

潛德弗耀君生數月而孤養於祖母史氏少長教之

讀書學性穎悟有成人之量及就舉選卽有聲場屋

間以兩赴廷試移籍大學時輩翕然推重之君資稟

厚重接物誠寔世俗機械舉不知有之居方城二十

年教授爲業僅有中人之產長子國器力於幹蠱故

君得優游自便賓客過門厚相接納爲具豐潔不類

寒士家不獨公卿達官愛敬之至於軍府悍卒輒甚

細民望君褒衣瞻腹言笑和雅亦皆訥訥焉嘗再娶
未幾婦卒其父哀悼成疾君往候之問之所親云公
初不病痛女嫁未幾而徒捐奩具耳君盡其所得者
直百金并兩女使悉歸之方城人有倉猝避吏留一
篋而去者君勅家人毋敢竊視事定其人復來發篋
驗之貯金滿中封識宛然如手未嘗觸者君之廉類
如此正大末京南大司楊公叔玉丞康公伯祿荐君
及猗氏薛曼卿武陟宋予之武清張仲升汴梁高振
之大名王大用等六人文章德行乞加官爵以厲風

石少卿示
卷八
俗事聞徵聘有期會兵動而罷里中郭提控者喪亂中聚老幼數千守一砦自保人有誣郭嘯聚爲亂者

州將捕繫之將至不測時立州治大乘山君就爲申理郭以無罪而君幾爲道梗不得還避兵之民無所逃而君擇貧病之尤者留養之賴以全活者甚衆群不逞乘亂以與相加父老有曉之者云爾曹麤暴如此獨不愧曹先生父子耶居襄陰又十年依尚書李仲臣仲臣爲之起廟學以師席奉君州人化君之德文風爲之一變君旣者自號巖巖老人有卷欄集

三卷藏於家君凡六娶曰陳氏徐氏張氏陳氏顧氏
皆前君卒今姑氏子男二人曰國器曰汝弼孫一名
孝曾孫二人女孫一人尙幼銘曰仁信而篤誠寬博
而和平以儒行槩之衆善具并何負于人而不能百
齡豈無百齡孰愈君之名城郭千年貞石有銘曰是
維子曹子之墓尙可以爲鄉人之榮

刑部副郎張公墓志銘

甬東萬

經編修

奉政大夫刑部陝西司員外郎霽巖張君墓君諱塏
字朗士磁州人高祖諱鏡心前明總督薊遼兵部尙

書曾祖諱潛順治己丑進士翰林院庶吉士贈禮部侍郎祖諱榕端康熙丙辰進士累官內閣學士兼禮部侍郎考諱丙謙州學生封內閣中書舍人再封刑部陝西司員外郎張氏自司馬公以勲名顯啓正之際庶常公與容城孫徵君講道河濱爲北方學者所宗而閣學公復以文章著名中外一時稱文學清望之臣故河北推世閥者必數磁州張氏君員外公長子幼善病母劉太宜人特憐愛之然學未嘗以病廢性篤孝劉太宜人患病君親視湯藥不交睫者累月

居喪毀瘠盡禮竹燈紙帳發先世藏書讀之書聲與
哭聲相聞聞者酸鼻已侍閣學公校上江左其地固
多名士閣學公尤負知人鑒聞後堂絲竹者率東南
勝流也君濡染庭訓退而與諸宿艾往復辨證上下
其議論學益日進康熙辛卯中河南鄉試君愀然以
太宜人不及見爲憾已遭員外公喪毀瘠尤甚服闋
入都以 恩例授刑部陝西司員外郎君固天性豈
弟至是益以矜恤爲已任遇命盜重案覆閱再三筆
踴躍不敢下大司寇廉君仁恕屬以青海獻俘諸大

獄獄上司寇稱平往時重囚爲隸卒所虐多瘼死君稔知其弊日必詣獄省視夏月洗剔杻械沃以水漿冬製絮襖給之施善藥療其疫癘終君任囚無失所者甲辰以恩例陞知府念繼母吳太宜人在堂逐省勤歸越五載長子瑛由鄞亟保舉試令鎮海君觀政來南疾作卒於子之官署時雍正八年十一月二十七日也得年五十有五配成氏封宜人子三長瑛次瑛國學生次瑜女二皆歸宦族孫男六人孫女二人君生長膏粱而能刮磨豪習委已於學自舉業

外詩歌古文及書法多可觀尤存心濟物急難叩門
不以有無爲解常州吳中翰未第時將赴北闈因於
資斧捐百金助之鄧州韓玉病困京邸君挾之出都
遺伴護歸新鄉張某道死停尸車上惻然買棺歛之
歲饑發粟爲糴紳倡他懿行多類是余觀唐宋時重
門第之選故韋杜韓呂諸子弟多憑家世致顯位其
事業亦多竒偉卓犖君厄於曹郎未獲竟其所施而
惻隱之心隨地滂流可稱已如此嗚呼其亦君子人
也已琁以九年五月奉君柩葬於城西南磨灣村西

詣門乞銘余不得辭銘曰益陽之原泉深土堅後千
百年過者猶曰張氏賢大夫之阡

示二程書院諸生截句八首

僅存三首

山長

孫硯香

山西舉人

斐儿芸牕面面開
荷花香繞讀書台
風流有意歸宏講
問字何須載酒來

其二

舊手新梭錦價高
因緣千里一相遭
金針肯度難爲度
花樣鮮明屬爾曹

其三

開第康莊是墨莊
驅雲學雨總荒唐
而今別占鄉嬛

勝他日休同告朔羊

渠上竹枝詞二十首

錄十首

邑張

錢進士

渠分五爪自誰開包父前頭蔣後來響水梁和槐樹

里恩波灤折幾千回

按州志五爪渠明州牧包公始開至蔣公修之而水利大備響

水梁村爲修渠之始槐樹里爲建閘之始

其二

新渠泱泱潤如酥勝却天公爲雨珠三十六渠春漲

暖菴花流到總膏腴

新開渠載誌者三十六道

其三

獄家家渠上采新蘋

每村封閘司其
事者謂之老人

其四

春來渠水碧於油照見兒家碧瓦樓
杏子花飛麥花

落休教賣水放行舟

賣水久禁其
弊或未免也

其五

布穀布穀聲相呼出門野鳥喚提壺
郎去灌田濃決
水行饒還須仗小姑

其六

村喬村外客停驂綠意千畦一色含忽聽秧歌驚白
鷺教人風景憶江南

其七

慈姑花發團魚妾益母草深肥鴨兒相約燒香入城
去幾回渠上照新眉

其八

郎住渠頭儂渠尾願郎祇似渠中水日日門前總見
渠寄書不用渠中鯉

其九

梁王橋下水涓涓多少荒田變水田不怕石橋移
大至今人說趙公賢

其十

上渠流水下渠牧東開開溝西開流處處黃雲堆稻
把十分水是十分秋

貞鴛詞

張鏐

爲劉貞婦作婦磁邑南鄙人幼受劉氏聘既
而劉子邁奇疾僂跛蹙不可以人翁姑交
母僉議離異婦不可曰女初聘時夫固無恙
今若此天也背之不祥卒適劉凡飲食起居
相夫者無不至或負之出入里人謂之曰好
離鴛乃匹此跛鵞耶婦若罔聞者逾年而劉

子卒又議改適卒不可奪以無知村
女而志節如斯殆天性也爲賦此詩

采采雛鴛匹此跛鴛匪鴛之生跛鴛之匹則那一

日已而父曰離之以意喻女女志不可移二女之初

聘良人粲粲女之既聘邁此疾患天實爲之夫何憾

鮮一女本鄉愚不知他計但聞夫一不可有二四曷澣

我衣曷褰我裳言適劉氏相我跛郎五偃僂遽條實

爲我夫跛鴛之呼若罔聞諸六或飲或哺或掖或扶

或負之走躑躅忘劬七胡天不弔奪我跛郎人或慰

之涕泗浪浪八豈無鳳鸞匪鴛所慕豈無鶴鶴九

所顧九跛有老母跛有嗣兒事之畜之如相跛時十一

人之所苦女之所甘匪知禮義行其心所安十一石解

其女心織其女腸作貞鴛詞以勵綱常十二

解

歸鳳曲 事見本傳

張 箋

情波不斷珠江水彩鳳迎歸六千里賴有多情刺史
賢天涯海角諧連理連理重諧費護持風波陡作爲
楊枝訟興雀角謀何黠志矢蛾眉節不移自言曾作
陽君婢羅敷夫婿青雲士潞水良朋贈意珠絳帷假
館修眉史眉史纔修鳳侶新驪歌倏忽動陽春郎君

去作金門客賤妾歸依白髮親記得邯鄲同挽鹿郵
亭話別情非薄就木甘餐甘教期分釵共矢三生約
陌上花開返故鄉兒家門外認垂楊從茲變作相思
樹溢水燕雲信杳茫傳聞瑁璫春風惡又聞檄捧南
飛鶴奉帚難爲度嶺雲張羅誰逼南山鵲南山鵲豈
別枝棲冰語無端到冷閨已分山頭身化石肯隨風
裡絮沾泥維持風教推仁牧忍教貞鳳鴟爲逐宛轉
爲謀護鳳巢殷勤爲致離鸞牘一紙鸞牋路幾千寒
隔海國夢如平似畫何日春風吹綠柳文恨轉牽

轉瞬花風吹廿四海天始報鴻音至上感賢侯調護
情下感貞姬金石志五載稽遲信有因陽城豈是韋
臯倫指環已驗珠還約碧玉何慚玉潔人蠻江粵海
迎桃葉風濤遠渡愁無楫更分鶴俸助行裝只重貞
操非任俠遙知嶺外乍相逢疑是羅浮幻夢中話到
仁人同感泣香薰絲繡頌無窮君不見章臺柳被他
人折重圓幸有虞侯傑何如貞木鳳凰枝風霜不改
凌寒節又不見千秋遺恨綠珠樓卷裏崔徽亦自愁
佳話於今堪補恨更教名節重吾州由來名節

朝重新詞願補甘棠頌海南應亦詠周南
訟庭竚看來祥鳳

歸鳳曲

府書院
山長

鄭

城

杭州
進士

碧梧高聳青雲表鳳凰豈肯隨凡鳥
已拚紈扇泣秋風那堪杜宇啼春曉
滄水光騰鳳彩鮮錦雲扶上孝廉船
絳紗問字朝同讀紅袖添香夜不眠
公車催送看花客同車漸近邯鄲驛
故鄉重認舊巢痕柴門不踏新苔迹
但看釵頭鳳鳳兒家名字郎須憶
郎君作宰試鳴琴井落銀瓶少信音
金雀花香千蝶撼銀

光紙好萬蠅侵妾心皎潔似瓊壺笑說羅敷自有夫
涼宵甘作孤飛雁濁水寧隨逐隊魚風流刺史懸冰
鏡分明照見蓮心淨蒲鞭打散野鴛鴦妾心行志公
行令青蓮拔出污泥早紅顏甘向秋風老若教彩鳳
竟單飛終覺此心猶未了濤箋親寫托郵筒迢遞雙
魚西復東金屋有緣鸞鏡合銀河無路鵲橋通一朝
打漿迎桃葉歸時郎面應羞妾一片冰心大婦知我
見猶憐俱感泣香浦懽同比目魚羅浮妒煞雙飛蝶
深閨膜拜佛香熏供奉郇公五色雲丹山若有將雛

信更託歸鴻報使君

爐峯朝靄

許 賦

老君騎白鶴山畔會羣靈
會罷爐煙散長空一葉青
響堂晚鐘

山南響堂寺千載仰金碧
向晚鐘聲來喚醒夢中客
龍洞珠泉

驪龍出洞去洞深不可測
洞口珍珠多却笑無人拾
漳渡晴瀾

招招舟子來渡口近三臺
日出晴瀾好金光萬道開
滄橋秋月

石橋淦水上，偃偃重輪。月中秋月更佳，素娥衣似雪。

臺城煙樹

臺城楊柳多，趙王避暑處。宮殿委灰塵，空餘此煙樹。

官路荷風

淦陽北郭外，官路向燕京。無復采蓮女，荷風空有情。

賀蘭積雪

賀蘭山畔雪，烈日照愈好。真仙臥不起，千載無人插。